

# 菩薩摩訶薩於一切諸法無集散亦不住

——「大智度論」集粹之三十八

智 銘

須菩提白佛言：「世尊，我不覺、不得是菩薩行般若波羅蜜，當爲誰說般若波羅蜜？我不得一切諸法集、散，若我爲菩薩作字言『菩薩』，或當有悔。世尊！是字不住，亦不住，何以故？是字無所有故。以是故，是字不住，亦不住。世尊！我不得色集、散，乃至識集、散，若不可得，云何當作名字。世尊！以是因緣故，是字不住，亦不住，何以故？是字無所有故。……世尊！我不得諸佛集、散，我亦不得十方如恒河沙等世界諸佛，及菩薩、聲聞僧集、散。世尊！若我不得諸佛集、散，云何當教菩薩摩訶薩般若波羅蜜？世尊！是菩薩字不住，亦不住，何以故？是字無所有故，以是故，是字不住，亦不住。世尊！我不得是諸法實相集、散，云何當與菩薩作字，言是『菩薩』？世尊！是諸法實相名字，不住，亦不住，何以故？是名字無所有故，以是故，是字不住，亦不住。」

先品中，多已說：「不見菩薩、菩薩字，般若波羅蜜，一切諸法不內、不外、不中間」等，此處所以又重說者，是因法愛中過患難見，爲欲盡除，是故重說。愛有四種：欲愛、有愛、非有愛、法愛。欲愛：易見，其過不淨等。有愛：無不淨等，小難遣。非有愛：破有，破有似智慧故，難遣。法愛者，愛諸善法利益道者，過患難見亦難遣。

先品說菩薩字不見，此中說菩薩字不覺、不得，以不覺、不得故不見。非是智慧力少故不見。從無始已來，衆生不可得，非行般若波羅蜜故不可得。但以虛誑顛倒，凡夫人隨是假名故謂爲

有，今行般若波羅蜜，滅顛倒虛誑，了知其無，非本有今無，本有今無，則墮斷滅。佛法中一切諸法決定無我，而我說言有菩薩爲說般若波羅蜜，則墮妄語罪。一切法以不可得空故皆空，所以者何？無集、無散故。譬如眼色因緣生識，三事和合故生眼觸，眼觸因緣中，卽生受、想、思等心數法。是中邪憶念故，生諸煩惱罪業；正憶念故，生諸善法。善、惡業受六道果報，從是身邊復種善、惡業，如是展轉無窮，是名爲集。餘情亦如是。散者，是眼識等諸法，念念滅故，諸因緣離故。是眼識等法，生時無來處，若滅時無去處。生時無所從來，散時無所從去，是諸法皆如幻化，但誑惑於眼。

雖云有集、散相，但無來處，集不可得，無去處，散不可得，又生無故集不可得，滅無故散不可得；畢竟空故集不可得；觀世間滅諦故，集不可得；觀世間集諦故散不可得。如是等義，當知集、散不可得，云何當作菩薩字？若強爲其名，是名亦無住，亦無不住。

名字在法中住，法空故名字無住處，因緣散時尚無，何況因緣滅？衆生亦如是，色等五衆和合故，有衆生名字，若五衆離散，名字無住處；五衆離散時尚無，何況無五衆！是菩薩名字一，五衆則有五，一不作五，五不作一，以是故，一菩薩字，不得五衆中住；非不住者，若名字因緣和合無，則世俗語言衆事都滅；世諦無故，第一義諦亦無，二諦無故，諸法錯亂。若因緣中有名字者，如說火則燒口，說有則塞口；若名字不在法中者，說火不

應生火想，求火亦可得水。從久遠來，共傳名字故，因名則識事，以是故，說名字義，非住、非不住。如菩薩名字，所謂五象、十二入、十八界等諸法，亦如是。

離有二種：一者、身離，二者、心離。身離者，捨家恩愛世事等，閑居靜處；心離者，於諸結使，悉皆遠離。復有二種離：一者、諸法離名字；二者、諸法各各離自相。此中說後二種離，所以者何？此中破名字故，餘處自相離。小乘法中，多說前二種。寂滅亦有二種：一者、純善相寂滅惡事；二者、如涅槃寂滅相，觀世間諸法亦如是。此中但說後寂滅。不生亦有二種：一者、未來無爲法名不生；二者、一切法實無生相，生不可得故。此中但說後不生。不滅有三種：智緣滅，非智緣滅，無常滅。此中說無常滅。與此相違，故名不滅。不示者，一切諸觀滅，語言道斷故，無法可示是法如是相；若有若無，若常若無常等。不垢、不淨，如、法性、實際，法相、法位義，如先說。

行者得如、法性等，故名爲集，失故名爲散；如虛空雖無集無散。善、不善，乃至十方如恒河沙等諸佛義，是諸法及佛名字，無所依止，故皆空，不住非不住。

須菩提白佛言：「世尊！諸法因緣和合，假名施設，所謂菩薩。是名字於五陰中不可說，十二入、十八界，乃至十八不共法中不可說，於和合法中亦不可說。世尊！譬如夢，於諸法中不可說；響、影、焰，化，於諸法中亦不可說。譬如虛空名，亦無法中可說。如地，水，火，風名亦無法中可說。戒、三昧、智慧、解脫、解脫知見名，亦無法中可說。如須陀洹名字，乃至阿羅漢、辟支佛名字，亦無法中可說。如佛名、法名、亦無法中可說。所謂若善、若不善，若常、若無常，若苦、若樂，若我、若無我，若寂滅、若離，若有、若無。世尊！我以是義故心悔：一切諸法集、散相不可得，云何爲菩薩作字，言是「菩薩」？是字不住，亦不住，何以故，是字無所有故，以是故，是字不住，亦不住。若菩薩摩訶薩聞作是說，般若波羅蜜如是相、如是義，心不沒、不悔、不驚、不畏，不怖、當知是菩薩必住阿鞞拔致性中，住、不住法故。」

非住、非不住門，破菩薩名字及諸法。今更以異門破菩薩名字，無法可說爲菩薩。何以故？菩薩非是五象，五象非是菩薩；五象中無菩薩，菩薩中無五象；五象不屬菩薩，菩薩不屬五象；離五象無菩薩，離菩薩無五象。如是菩薩名字不可得，當知是空。乃至十八不共法亦如是。譬如夢中所見，皆是虛妄不可說，此夢中無有定法相，所謂五象、十二入、十八界，但有誑心；餘影、響、焰、化，亦如是，但誑耳目。如虛空，一切法中不可說，無相故。虛空與色相違故，不得說名爲色；色盡處亦非虛空，更無別法故。若謂入出爲虛空相，是事不然，是身業非虛空相，若無相，則無法；以是故，虛空但有名字，菩薩名字亦如是。

無智人謂地、水、火、風等諸物以爲實，聖人慧眼觀之，皆是虛誑。諸凡夫人見微塵和合成地，謂爲實地，餘有天眼者，散此地，但見微塵；慧眼分別破散，此地都不可得。若地是實，云何一切火觀時皆是火？若以禪定觀爲實，佛說一切法空爲虛妄，但是事不然！水、火、風亦如是。如四大爲身，本猶尚爾，何況身所作持戒等諸業而不空！如戒等粗業尚空，何況禪定、智慧、解脫、解脫知見等而不空！若戒等五象空者，何況是因緣得諸聖道果而不空！若聖道果空，何況須陀洹人乃至佛而不空！以是故，菩薩名字雖善法，乃至有無法中出，不名爲善，乃至不名爲有無，集、散不可得故。須菩提知空相如是，云何說名菩薩，爲說般若波羅蜜？若菩薩聞是，不恐不畏，則是阿鞞拔致中住，以如不住法住故。阿鞞拔致性者，是菩薩未得無生法忍，未從諸佛受記，但福德智慧力故，能信樂諸法畢竟空，是名阿鞞拔致性中住，得阿鞞拔致氣分故。

須菩提白佛言：「世尊！菩薩摩訶薩行般若波羅蜜，色中不應住，受、想、行、識中不應住，眼、耳、鼻、舌、身、意中不應住，色、聲、香、味、觸、法中不應住，眼識乃至意識中不應住。……世尊！以是因緣故，菩薩摩訶薩欲行般若波羅蜜，不應六波羅蜜中住。」

須菩提以「不住門」，直爲菩薩說般若波羅蜜。般若波羅蜜有種種名字：觀、修、相應、合、入、習、住等，是皆名修行般

若波羅蜜。行名：聽聞、誦讀、書寫、正憶念、說、思惟、籌量、分別、修習等，乃至阿耨多羅三藐三菩提，總名爲行。是行中分別故，初者名觀，如初始見物，日日漸學是名習；與般若相應可，是名合；隨順般若波羅蜜，名相應；通徹般若波羅蜜，是名爲入；分別取相有是事，名爲念；常行不息，令與相似，是名爲學；學已，巧方便觀，知是非得失，名爲思惟；以禪定心共行，名爲修；得般若波羅蜜道不失，是名住；與住相違，名不住。

說空又更說不住者，著法愛難遣故，乃今更說。復次，有無相三昧，入此三昧，於一切法不取相而不入滅定；菩薩智慧不可思議，雖不取一切法相，而能行道。於諸法中不住，而能行菩薩道。不住者，以空故無所住。

須菩提白佛言：「世尊！菩薩摩訶薩欲行般若波羅蜜，色是無常，不應住，受、想、行、識是無常不應住；何以故？無常、無常相空。無常相空，不名無常，離空亦無常，無常即是空，空即是無常。以是因緣故，菩薩摩訶薩欲行般若波羅蜜，色是無常不應住，受、想、行、識是無常不應住，色是苦不應住，受、想、行、識是苦不應住；……乃至陀羅尼門、三昧門中不應住。如菩薩摩訶薩欲行般若波羅蜜，無方便故，以吾我心，於色中住，是菩薩作色行；以吾我心，於受、想、行、識中住，是菩薩作識行。若菩薩作行者，不受般若波羅蜜，亦不具足般若波羅蜜；不具足般若波羅蜜故，不能得成薩婆若。……是薩婆若，不可以相行得，相行有垢故。何等是垢相？色相乃至陀羅尼、三昧門相，是名垢相。」

垢法中不應住，善法中不應住，無記法中不應住，善、無記雖非罪，而能生罪因緣。如佛此中說：「有菩薩以吾我心行般若波羅蜜，住色中著色，爲生色故作諸業；受、想、行、識亦如是。」爲起五象故行，是爲不取般若波羅蜜。是人雖言我行般若波羅蜜，是爲世間行，不具足般若波羅蜜故，不能至一切智；乃至陀羅尼、三昧門，亦如是。須菩提自說不住因緣：「所謂色是不受，若色不受則非色。」性常空故。

著有二種：一者、欲著；二者、見著。有人觀是無常、苦等

，破欲著，得解脫；或有人雖觀無常等，猶著法生見，爲是人故，分別色相空，如是則離見著。乃至陀羅尼、三昧門，亦如是。菩薩久來知一切法不受，皆如無餘涅槃，畢竟空，是故不與二乘共。蓋二乘有習氣，有碍有障故，雖有無受三昧，不清淨。如摩訶迦葉聞菩薩伎樂，於坐處不能自安。諸菩薩問言：「汝頭陀第一，何故欲起似舞？」迦葉言：「我於人天五欲中永離不動，此是大菩薩福德業因緣變化力，我未能忍，如須彌山王，四面風起，皆能堪忍，若隨風風至，不能自安。」聲聞，辟支佛習氣，於菩薩爲煩惱。

是無受三昧，唯佛偏知，菩薩求佛道故，雖不能偏，而勝於二乘，以是故說：「不與二乘共」。以人貴重是不受三昧而生著心，是故須菩提說：「不但是三昧不受，色乃至一切種智皆不受。」所以者何？須菩提自說因緣：所謂十八空故不受。取著相故，生諸結使，相者，色乃至陀羅尼門、諸三昧門相，皆是煩惱根本。若佛法中，一切皆空，乃至無有法微相可取者、可受者、可住者、可著者。

須菩提白佛言：「世尊！菩薩摩訶薩欲行般若波羅蜜，應如是思惟：何者是般若波羅蜜？何以故名般若波羅蜜，是誰般若波羅蜜？若菩薩摩訶薩行般若波羅蜜，如是念：若法無所有、不可得，是般若波羅蜜。」

爾時，舍利弗問須菩提：「何等法無所有，不可得？」

須菩提言：「般若波羅蜜，是法無所有、不可得；禪波羅蜜、毘梨耶波羅蜜、羼提波羅蜜、尸波羅蜜、檀波羅蜜，是法無所有、不可得，內空故，外空、內外空、空空、大空、等一義空、有爲空、無爲空、畢竟空、無始空、……無法有法空故。色法無所有不可得，受、想、行、識、法，無所有不可得。……佛，無所有不可得；若婆若法、一切種智法無所有不可得。內空乃至無法有法空故。菩薩摩訶薩如是思惟，如是觀時，心不沒、不悔、不驚、不畏、不怖，當知是菩薩不離般若波羅蜜行。」

舍利弗又問：「何因緣故，當知菩薩不離般若波羅蜜行？」

須菩提言：「色，離色性；受、想、行、識，離識性。六波羅蜜，離六波羅蜜性；乃至實際，離實際性。」

舍利弗又問：「云何是色性？云何是受、想、行、識性？云何乃至實際性？」

須菩提言：「無所有，是色性；無所有，是受、想、行、識性；乃至無所有，是實際性。以是因緣故，當知色，離色性，受、想、行、識，離識性；乃至實際，離實際性。色亦離色相，受、想、行、識，亦離識相；乃至實際亦離實際相。相亦離相，性亦離性。」

舍利弗又問：「菩薩摩訶薩如是學，得成就薩婆若？」

須菩提言：「如是！如是！若菩薩摩訶薩如是學，得成就薩婆若。何以故？諸法不生不成就故。」

舍利弗又問：「何因緣故，諸法不生不成就？」

須菩提言：「色、色空，是色生成就不可得；受、想、行、識空，是識生成就不可得；乃至實際、實際空，是實際生成就不可得。菩薩摩訶薩如是學，漸近薩婆若，漸得身清淨、心清淨、相清淨；是故，是菩薩不生染心，不生瞋心，不生癡心，不生憍慢心，不生慳貪心，不生邪見心。是菩薩不生染心，乃至不生邪見心故，終不生母人腹中，常得化生；從一佛國至一佛國，成就衆生，淨佛世界，乃至阿耨多羅三藐三菩提。菩薩摩訶薩當作是行般若波羅蜜，當作是學般若波羅蜜。」

何等是般若波羅蜜？般若波羅蜜者，是一切諸法實相，不可破，不可壞；若有佛，若無佛，常住諸法相、法位，非佛、非辟支佛、非菩薩、非聲聞、非天人所作，何況其餘小衆生！復次，常是一邊，斷滅是一邊；離是二邊行中道，是爲般若波羅蜜。常無常，苦樂、空實、我無我等，亦如是。此般若波羅蜜是一邊，此非般若波羅蜜是一邊；離是二邊行中道，是名般若波羅蜜。如是等二門，廣說無量般若波羅蜜相。無所有者，般若波羅蜜，乃至五波羅蜜，無所有，不可取、不可受、不可著故。

何以故名般若波羅蜜者？般若者，爲智慧，一切諸智慧中最爲第一，無上、無比、無等，更無勝者，窮盡到邊。如一切衆生

中佛爲第一，一切諸法中，涅槃第一，一切衆中，比丘僧第一。世間有三種智慧：一者、世俗巧便，博識文藝，仁智禮敬等。二者、離生智慧，所謂離欲界，乃至無所有處。三者、出世間智慧，所謂離我及我所，諸漏盡聲聞、辟支佛智慧。般若波羅蜜爲最殊勝，畢竟清淨，無所著故，爲饒益一切衆生故。聲聞、辟支佛智慧，雖漏盡故清淨，無大慈悲，不能饒益一切故不如，何況世俗罪垢不淨，欺誑智慧。三種智慧不及是智慧故，名爲般若波羅蜜。是智慧爲度一切衆生故，爲得佛道故，是智慧相應，受、想、行、識，及從智慧起身業、口業，及生、住等心不相應諸行，是諸法和合，名爲波羅蜜。是諸波羅蜜中，智慧多故，名爲般若波羅蜜。如是等種種因緣故，名爲般若波羅蜜。

是誰般若波羅蜜者？第一義中無知者、見者、得者，一切法無我，無我所相，諸法但空，因緣和合相續生。若爾，般若當屬誰？佛法有二種：一者、世諦；二者、第一義諦。爲世諦故，般若波羅蜜屬菩薩；凡夫人法，種種過罪，不清淨故，則不屬凡夫。般若波羅蜜畢竟清淨，凡夫所不樂，凡夫人雖復離欲，有吾我心，著離欲法故，不樂般若波羅蜜。聲聞、辟支佛，雖欲樂般若波羅蜜，無深慈悲故，大厭世間，一心向涅槃，是故不能具足得般若波羅蜜。是般若波羅蜜，菩薩成佛時，轉名一切種智，以是故，般若不屬佛，不屬聲聞、辟支佛，不屬凡夫，但屬菩薩。

不離者，常行般若波羅蜜不虛，必有果報，菩薩如是知，不離實智慧，乃至實際亦如是。菩薩能行是無障礙道，得至薩婆若，一切法不生不出故。云何一切法不生？色、色相空，故色無生無成就，乃至實際亦如是。若菩薩能如是行，是清淨第一，無上、無比故，漸近薩婆若。漸近薩婆若故，心不生邪見煩惱戲論。即時得心清淨，心清淨果報故，得身清淨；三十二相、八十隨形好，莊嚴其身。得三種清淨故，破諸虛誑取相之法，受法性生身，所謂常得化生，不處胞胎。

菩薩有力如此，而仍化生其身，不取涅槃者，有二事因緣故：以諸佛是衆生中寶，欲供養無厭故；有本願度衆生、淨佛世界未滿故。是菩薩福德方便力故，常不離諸佛。